

KUMPUNAN
KHAWTLANG NUN
SIAMTHAT

YMA AW



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.28 17th July 2011

Assembly Budget Session neih mek a ni

Chanmari West, July 17: Mizoram State Assembly Budget Session chu neih chhonzawm mek a ni a, he session hi Ni 7.7.2011 atanga tan niin Ni 28.7.2011 a tawp tura ruahman a ni.

He Budget Session neih mek ah hian Ni 14.7.2011 khan State Budget tura ruahman Cheng Vaibelchhe 4,216.09 chu Finance Minister changtu Pu H.Liansailova chuan a pharh a ni. He budget pharh ah hian NLUP chu ngaih pawimawh ber tura dah a ni a, chhiah thar lakna tur kawng hrang hrang siam thar a awm bawka a ni. Budget pumpui ceng vbc. 4,216.09 zinga vbc.2,410.27 chu Non Plan niin, cheng vbc.1,700 chu Plan Fund a ni. NLUP atan hian cheng vbc.234-dah a ni a, Central

Sponsored Scheme atangin cheng vbc.15.83 hmuh beisei a ni bawka.

Budget langsar zual te chu :- MLA Local Area Development Scheme atan cheng nuai 1,000 dah a ni a, hei hi constituency pakhat atan nuai 25 zel ruahman a ni. Lunglei HPC tan cheng vbc.7 dah a ni. Tui connection leh lirthei lamah chhiah tihpun tum a ni bawka a ni.

Mizoram Sorkar hian nikum sorkar kum liamta thleng khan cheng vbc.3,410.21 leiba a nei a ni. Kumin sorkar kuma leiba a neih belh tur chu cheng vbc.170.51 a ni.

Central YMA buatsaih Gospel Camping neih zawh a ni.

Ni 10.7.2011 (Inrinni) khan Krista Hnungzuitu Tawngtai Bethel Camping Centre, Chawnpuia Central YMA in a buatsaih Ruihlo ngai leh Hmeichhe rahbi tleute puala Chhandamna Camping a buatsaih chu neih zawh a ni. Tarlan tawh angin he Campingah hian Campers 561 an awm a, an vai hian Pathianah siamtharna an chang a ni. Ni 11.7.2011 (Thawhtanni) khan Central YMA chuan Pathian hnenah lawmthu sawiin Bawng an talh a, Campers-te Pathian fakian an zaikhawm a, Testimony ngaihtlak niin, tlaiah hlim taka Ruai theh a ni.





Son of God Ministry Team te leh CYMA hruaitute





Campers te hlimtakin an lam

Branch News

 YMA Zawlbuk sak hna chu thawh chhonzawm zel a ni a, hnatlang ngawrh taka neih thin niin YMA member hnatlang thin te chungah Br.YMA chuan lawmthu a sawi takzet a ni.

 Kar hmasa lamah chhiah kan tawh ngun deuh avangin, Chanmari Branch YMA te chuan thlan laihna senso atan Rs 1000/-min rawn pe a, an chungah CWBYMA chuan lawmthu a sawi takzet a ni.

 Tv Lalthanpuia Tochwawng S/o TC Lalremsiama 'V' Section chu India ram aiawh turin Karate Championship China-a neih turah a kal a, a rawn champion haw ngei nan CWBYMA chuan duhsakna a hlan a ni.

 Kan vengchhung atanga pem chhuak tur ten 'Pem Lehkha' Branch Secretary hnena lak hmian, mahni awmna Section Leader/Secretary te hnenah lehkhah lak hmasak tur a ni a, chumi hmang chuan Branch atangin pem lehkhah pangngai chu lak chhuah tur a ni.

NGENNA

1. Kan Branch YMA member Tv Lalthanpuia Tochwawng S/o TC Lalremsiama 'V' Section a mi chu Asia Karate Championship neih turah India Ram aiawh turin a kal a.Ni 22.7.2011(Zirtawp) khian a khel dawn a, hlawhtlinna a chan ngei theih nana Pathian hnena lo tawngtaipui turin vengchhung mite min sawmin min ngen tak meuh meuh a ni.

2. H.Zoramthanpuia S/o Lalruiaia (T-Sect)chu Manhunt reality show-ah a la tling ve a, thawhlejni (19.7.11) tlailam dar 5 thleng hian vote theih a ni. Veng mipuite kan veng tlangval hi vote theuh i tum ang u. He number ah hian vote tur a ni e:- **9862648903**



TUN KAR CHANGVAWN

He Pathian hi kumkhaw tlaitsuana kan Pathian a ni dawn si a: Thih thleng pawha min hruaitu a ni ang. **Sam 48:14**

Editorial Board

Editor

RK.Rozidinga
9436142304

Joint Editor :

RK. Malsawmkima
9862578441

News Editor

Tv. Thangkuma
9862303135

Pu Vanlalhluta
9862366308

Tv. Vanlalfawna
9856301975

Cir. Manager

Johny Lalthanpuia
9612359161

Jacob Lalrinsanga
9612319779

Production

Manager
R.Lalmachhuana
9436151817

Branch Office Bearer

President

T.Ngurkhuma
9436190843

Vice President

R.Lalmachhuana
9436151817

Secretary

RL.Thanhnuna
9436152760

Asst. Secretary

K.Darthanthuanga
9436196071

Treasurer

C.Lalzarliana
9436142049

Fin.Secretary

Lalthuamluaia
9612216649

Advisers

Pi Zamanthangi
Pu Vanlalsawma
Pu Rothuama
Pu Lalbiakthanga
Khiangte

Nang erawh chu engkimah fimkhur la, hrehawm tuar la, Chanchin Tha hriltu lam hna thawk la, i rawngbawlna kha hlen rawh. II Tim 4:5

Editorial : SMS huang kan siam a thu kan dawn 'sava veh chungchang' kha in vei lawk teh ang. Mizote hi nungchate khawngaih leh dimdawi nachang kan hre lo rei hle mai. Sava leh ramsa kan hmuh phak apiang thah tum mai kan ni a, ei tlak mang lohte thlengin kan hmuh remchan phawt chuan kan that mai thin a, a zia lo hle a ni. Mizote zingah nungcha humhalh a tulna hria an pung zel a, thangthar zingah nungcha humhalh duh tak taktu thahnem tak an awm ta a, thil lawmawm tak a ni. Nungchate tihnat leh thah reng reng duh lo an pun zel lai hian, tun thlenga nungchate chungka kutthlak châk tlat kan la awm reng erawh thil pawl tak a ni. Thenkhatin sava bu chhehna tur thlenga siamsak an duh tawhlaiin, sava veh la ching leh sava bu hmuh fuha a naute awm chungka lâk tum tlat maite kan la awm zel hi sim a hun tawh hle mai. Hun rei tak chhung ramsa leh sava kâp/âwk thei nih kan duh a, tunah chuan a humhalh lam kan intihhmuh ta. Nungcha humhalh kawngah tun aia nasa zawkin tan la zel ila, kan theih ang chin chinah nungcha te hi i humhalh i tum theuh ang u.

Article :

KHAWTLANG NUN SIAMTHAT A TUL

- K.Sangkhuma

Khawtlang Nun Siamthat hi khua leh tui thate chanvo a ni. Mizoram hian hma a sawn zela, vantlang nunphung erawh a tlahniam zel thung a. Khawtlang nun siamthat hna hi tharuma thawha thawk-leh-khat a, "khai aw le" tichunga zawh mai theih a ni lo, a sa kal hriat a ngai a, muang mar tha tak si, awmze nei leh thin nel tak chungka beih reng ngai a ni. YMA & mi thate (good citizen) te hian mutmawh hnar mawha kan beih na na na chuan kan khawtlang nun hian parchhuah hun a la tawng ngei ang tih hi i ring tlat ang u.

Han ngaihtuah vang vang hian kan ram nun hlui atanga tun hun thlenga min hruai ngil tu leh mi anga min siamtu ber chu '**Chanchintha**' hi a ni. Mizoram phei hi chu Kohhran atanga siamthatna lo awm ani bik leh zuala, mi lu la hnam ni thin kha, saruak khawsa thin hnam chu chanchintha engah hnamdang miten Kohhran an rawn phun a; chu Kohhran atang chuan finnate, thiamna te, hmasawna chi hrang hrang te kha kan dawng a, kum reilote chhungin hnam fing leh changkang takah min hlangkai ta a, kan chhehvel hnam te entawn tling khawp kan lo ni ta hial mai.

Kohhran lo din tanna hi a kum 100 a tlinna 1994 khan kan Centenary chu kan lawm chauh ala ni. Pu Rokunga'n "**Chanchintha in kan ramah ramhuai a um bo ta, kan ram chanchintha bul chu hei ngei hi alo ni,**" a tih ang chiah hi kan lo ni.

Pathianin chanchintha min pek hi a lawmawm tak zet a ni. Tunhma lama sual leh tha pawh thliar hrang pha ngailo khan, sual kan hua in, sual chu kan ramah a langsar ta em em mai anih hi. Hei hi Kohhranho mize mawitak atanga kan teh vang a ni. Kohhran thurin leh zirtirna leh a thuthlung ber Bible zirtirna chuan mihring nun a kaihruai tha em em a.

Kohhran hmasate phei kha chu an awmho thin, engkim an intawma, Krista thawhleha chanchintha thuin an in pumkhat a, khawvelin a tibuai phak lo. Hmangaihnaa rawng inbawlsak tawnin an awm a, Krista dan an zawm thin a tih theih ang. Chhungril atanga pawn lam thlenga danglam kha a pawimawh em em a ni. Zakaia'n Lal Isua a hmu a, chutah tuma hrilh ngailovin leh tuma phut lohvin a sum neih pachhiate hnenah pek a intiam a, a lo hlepruk te pawh a sawi nghal ngei ang. Hei pawh hi Social Reform a ni, khawtlang siam thatu nun a ni.

Khawtlang siam thatna (Social Reform) kan han mamawh zia mai chu:-

- 1) Thil zawrh buk dik te.
- 2) Rinawm zawka hnathawh tur te.
- 3) Zu leh sa, Drugs laka inthiar fihlim turte hian tun aia nasa hian Pathain Thlarauvin min nawr dawn lo, hei aia nasain chakna pawh min pe tawh dawn in a rinawm loh. Bukna khai dan dik hmang turin Bible a hranpa a kan pawh a ngai lo.
- 4) Mi tu emaw hausa hle mahsela, a hausak dan a dik tawh lo a ni tih kan hriat chu ngaihsan loh mai ngamte hi kan va mamawh ta em!
- 5) IAS officers pawh nimahsela, zu ti mi leh Pathian ngaihsak lo mi chu nupui/pasal atana hnawl ngam a va tul ta em.
- 6) Dikna atak a hmang ngam mi hi an ngaihsan awm, i ngaisang ang u.
- 7) Pathian thu hi sawi sawi mah ila, kan khawtlang nun a zalen a a him si loh chuan a zahthlak in a inmil si lo.

Drugs chungchangte hi "Khawtlang Nun Siamthatna" kan ngaih em em na kil khat pawimawh chu a ni. Mi chhiantha ngei ngei tur han zuar duh hi tihdanglam deuh chu kan ngai hle lo maw! Thil thalo chu zuar lo mai thei turin Pathian Thlarau Thianghlim in kan kut min ben kiansak kher kan nghak dawn em ni ang? A tha lo a ni. Thihna a ni tih kan hriat hi zawm tur a ni mai dawn lawm ni?

Chuvangin, tan ila ang u, Kristian khawtlang nun chu a zalen tur a ni a, a fir tur a ni a, a him tur a ni a, a rintlak tur a ni bawh ang. Van khua leh tui kan nihna hi tunah nun chhuah pui ila, vanah insiam that vak angai tawhlo anga, taksa tihdanglam chauh kan bak anga, kan mikhual lovang. Tuna kan thlarau nun hian pawnlam a thlen phak loh lutuk zawngin Vanramah kan mikhual lutuk anga, in siamrem (adjust) tur a tam lutuk ang. Theitawp chhuahin pawnlam nun pawh hi siamthat, siamdik i tum hram hram ang u. Kan Kristianna hian pawnlam nun entawn tur siamtu Zakaia te, Pawla te, pa taima nun te kha a hlat lutuk palh ang e.

KHUANGCHERA

Sumtuak hnatlang an neih thin chu zawh fel a ni ta a, member hnatlang thawkchhuak zawng zawng chungah lawmthu an sawi takzet a ni. Hnatlang ei leh in tumsaktu an Leader chungah leh hnatlang tanpui nana sum petu Pu F.Thangpuia hnenah lawmthu an sawi baw.

An Secretary eizawna thila Champhai lama zin pawh damtakin a lo haw leh ta.

An Secretary ni thin Pu Lalsangzuala Hauhnar chuan Testament Hindi & Linguistic Institute School-a Matric tha taka a pass chu an chhuangin an lawmpui hle.

Vengchung a lo thianghlim theih nan chhungtinte mahni in leh a vel vawngfai theuh turin an in ngen.

TAITESENA

Chhiatni Fund la tifel lo Bial la awm te aranglama tifel thuai tawh turin an in ngen a, section chhunga la pe lo te pawh a ranglama tihfel tum theuh turin an in ngenin an inhriattir.

An hruaitu Pu RK.Malsawmkima damlo pawh a dam leh thuai theih nan duhsakna an hlan.

An hruaitu pawimawh leh tangkai tak lo ni tawh eizawna avanga hmundanga awm ta Pu Malsawmkima chuan Ni 13.7.2011 khan a boralsana, a kalsan tak a nupui fanaute an tawrhpu hle.

Section chhung a lo thianghlim a alo fai zawk theihna turin chhungtinte mahni inbulhnaifelfai taka vawng thianghlim chhunzawm zel turin an in chah nawn leh.

Section bungrua engemaw vanga hmangtuten dimdawih tak leh felfai taka dah leh thin turin an in ngen.

NEUVA

An Leader Pu Lalthanruma leh an hruaitu Pu H Vanlalruata ten accident an tawh chu pawh an tiin an dam that leh thuai an duh.

An hruaitu Tv.Lalhminghsanga Pautu in BA a passed chu an lawmpui hle a, hruaitu te Ha lo tat hriam turin an in hriattir.

Nimin zing khan Vanapa Section hruaitu te nen High Field ah Football Friendly Match ropui tak an khel a, an hlim tlang in zawng chhang tlak an ti hle.

(N-Section Report chhunzawmna)

Zirtawp zing khan YMA Zawlbuk sak kal zel ah Balu thiar a Section hnatlang neih a ni a, member an thawk chhuak tha hle.

Vengchungah chhiat tawh an awmin member te thlanlah, mitthi lumen leh khawharin kalah te tanla deuh deuh tur in an in ngen.

An Section atangin hriat theih chin ah heng mite hian an zirlai an passed a an lawmpuiin an zir leh zelna turah duhsakna an hlan.

1.Laltlanhlui I Div.Bsc

D/o Lalremruata Hauzel

2.Lalmuanzova III Div.B.Com

S/o Lalthanruma

3.GLallawmawma II Div.BA

S/o G.Zama

4.Lalhminghsanga Pautu, III Div. BA

S/o Lalsailovi

VANAPA

Nl.Lalhriatchhungi D/o Kaphnuna leh Tv H.Lalnunthara S/o H.Chuanghsanga ten BA IInd Div. ah an Pass a an lawmpui takzet ani.

Ningani Zingkar khan Iron Rod thiar hnatlang neih ani a, Qtls 50 lai thiar ani.

Nimin zingkar khan Neuva Section hruaitu te nen Football Friendly Match khelh ani.

Rev. Vanlalmawia te Chhungkua Biate atanga rawn pem Ronald Lalkhuma te inluah leh Pu Lalrinsiam te chhungkua Zuangtui atanga rawn pem te Branch ah pawmpui tura thlen an ni.

CHAWNGBAWLA

Thalai Inkohkhawm kha karleh Ni 21.7.2011 (Ningani) zan Dar 7:15 hian Springdale School-ah neih tur a ni a, a hranpa a lehkha siam a ni tawh dawn lo tih an inhriattir. Information Mike ah puan leh a ni ang. Thalai rual chu kal vek turin an in ngen.

ZCC NEWS

Kar leh hun rem chang hmasa ber ah Committee neih tum a ni.

An member Kitty Lewis damlo chu a dam leh thuai an duh sak hle.

Clup member te programme neih nikhua a thahnemngai tak a rawn thawkchhuak thin te chung ah lawmthu an sawi tak meuh meuh ani.

Sub - Committee Report**Park Sub-Committee :-**

YMA Park-in hma a sawn theihnan leh a enkawl chungchanga thurawn/rawtna pe duh tan a hnuai Phone No. ah hian hriattir theih reng a ni e.

9436156250 & 9436196071

Park a lo thianghlima a lo nawm zawk theihnan vengchung mipuite theitawp chhuaha enkawl theuh tura ngen kan ni e.

Property & Information Sub-Committee :-

Section-a mike thalo te siamthat mek zel a ni e.

K-Section lam leh YMA Buk Inkar a mike wire chu rukbo a ni a, wire thara thlak leh nghal a ni. Hetiang ti thin te hi vengchung mi kan nih chuan tih tawh loh nise a lawmawm ngawt ang.

CWSC NEWS**Football Sub-Committee :-**

Ni 15.7.2011 (Zirtawp) zan khan an Secretary Pu Lalhminghsanga te inah committee pawimawh tak neih niin hmalakna tur hrang hrang ngaihtuah a ni.

Tun Season atana 2nd Division Players Registration chu zawhfel tawh a ni a, players register zawng zawngte thahnemngai taka lo practice tan turin an in ngen nghal baw.

Hmalakna hrang hrang neih ah te committee member-te thahnemngai taka thawkchhuak thin turin an in hriattir.

Voelleyball Sub-Committee :-

Ni 26.7.2011 (Thawhleh) hian vengchungah Sangha zuara inhlawhna neih tura a ni a, he inhlawhna hi veng mipuiten lo ngaih pawimawhsak hram turin an ngen a ni.

Hruaitute mahni Section-a thahnemngaitaka sangha lei duh tur zawng theuh turin an in ngen nawn leh.

SAWMNA

Kan Fanu Carter H.Zarzoliani leh Lalhmachhuana (Mama) s/o Lalramliana (L) Tuikual S te ni 21.7.2011 (Ningani) dar 2:00 pm a BCM Central Church, Kohhran Hall, Republic Veng a an inneih na min lawmpui tur leh in lama in thlahna dar 11:30 a.m a min hmanpui turin Veng chung mi zawng zawng te kan sawm a che u.

H.Lalrinthanga te Nupa V-28, Vanapa Section.

Infiamna khawvela bazar hrang hrang

- T-a

Infiamna hi khawvela sumdawna lian ber pakhat a ni tawh a, chung zingah chuan European Football bazara sum leng vel leh an inleina hi turu tham tak a tling. Tunah hian player thate man a to em em tawh a, heti ang taka footballer man a to ta hi UEFA pawhin a buaipui tawh a, 2000 hnu lam atang khan a pung thut a ni ber.

Football bazar hi professional league dang nena khaikhinin a kalphung a danglam viau a, club danga contract nei lai pawh sum thiltitheihna leh thil dang avangin an inchhuhsak thin a. Football ngaihventute chuan player tha lei harsatzia hriat tel a tha khawp mai. FIFA leh UEFA pawhin a thunun hleih theih loh khawpin bazarah player an to a, tunhma chuan awmze nei zawkin player an inlei thin a, tunah erawh chuan club-in an hnena contract nei lai player-te an duh zat zat chhiarin hei hian inlei a tiharsa em em.

Entiran; Samir Nasri hian kum khat daih Arsenal-ah contract a la nei a, Arsenal hian ziah belhtir tumin dawr mah se an inrem thei rih lo. Tarlan dan chuan pound maktaduai 20 velin club dangin lei an tum a, Arsenal-in an remti lo. Kalphung pangngaiha chuan Nasri-an Arsenal-a contract a la nei kum khat chhunga a hlauh lak tur chhutin, thla khatah pound mtd 1 hlauh ta se, thla 12-ah chuan pound mtd 12 a hlauh dawn tihna a ni a, pound mtd 12 vela lei chhuah theih tura ngaih a ni.

Player an inleisak dawn a nih chuan contract mila inlei chhuah hi FIFA leh UEFA duh dan a nih laiin, club-in hralh chhuah an tum loh player-te club dangin lei luihsak an tum tlat avangin a buaithlak ta thin. Mahse, player hlutnaah hian contract an nei dan erawh chuan kawngro thui tak a la su reng. Player tha; kum naupang leh contract la ngah tak lei chhuah nan chuan sum hlawm lian sen a ngai lo thei lo va, contract nei tlem tawh lei nan sum tam tak sen ngai lo tura ngaih a nih laiin, club-in an duh luat avangin to takin an lei ta thin a ni.

2000 chhovah Real Madrid-in an duhzawng player lawr kualin, hnar theih miah loh tura tam sumin an dawr a, player hnenah hlauh tam tak tiamin club dang tan pawh lawmna tham sum an hlui a, club dang tan dan tan ngaihna a awm lo. Player inleina hi club leh club indawrna a ni a, an inrem hnuah player leh a club zawm tur club-in hlauh leh mimal thilah inremna an siam ve leh a, man to taka an lei player chuan a hlauh tlem thei lo va, an inleina sum zatin player hlauh tur zat a keng tel fo.

Tunlaih phei chuan contract an ziah rualin club-in club dang laka ven nan lei chhuah theihna zat tur an ziah teltir thin. Club-in an hnena contract la nei player chelh luih tlat theihna a nei a, chutih laiin

player-in contract a nei sa a hman zawh chiahin a zalen a, a duhna ber club zawm theiin, club dang tan lak luhna sum sen a ngai lo. Hei hi Bosman rule (free transfer) tiin an sawi. Club-in an hnena contract nei lai reng pawh an duh chuan hmun dang pan turin an chhuah zalen thei bawk. Loan awm lehin, club-in club dang player lei si lovin an hawh a, loan hun a tawpah contract a nei hna club-ah a kir leh thin. Loan-ah hian inlak chhuahna sum a ngai hran lo va, club leh club an inrem hnuin player leh loan-a a chhuahna tur club-ten hlauhah inremna an siam leh a, loan-a player latute hian inleina sum (transfers fee) seng lo mah se, an kawh chungin player hnenah hlauh an pek a tul.

National Basketball Association (NBA)-ah chuan bazar tia kan sawi hi 'trade' an ti a, season chawlh lai hian NBA-a la tel pha lo, inhlankai tum khawvel hmun hrang hrang atanga fuankhawm player-te che tla atangin ranchise (club)-ten an duhzawng lain contract an ziahpui thin. Hei bakah hian player langsar sa pawh team dangah an insawn bawh thin a, mahse, European Football bazar angin club danga contract nei lai inchhuhsak a awm ve hran lo; player-in contract a nei sa a hman zawhin club dangah a insawn chauh thin.

Formula One-ah pawh driver-ten contract an ziah tawh an hmang zo ngei ngei thin a, football angin kum rei tak tak erawh contract an ziak ve ngai mang lo thung. Rokhawlhna lian tak a awm a nih erawh chuan driver leh team inbe rawnin an lo inrem tawhna an tidanglam thin. 2007 kum tawp khan Fernando Alonso chuan kum khat dang McLaren-ah contract la nei mah se, lungawi lohna nasa tak a nei avangin team nen inrem siamin a contract an tihtawp.

2009 kum tawp khan Ferrari chuan an hnena kum khat daih contract la nei Kimi Raikkonen an chhawr duh tawh lo va, a contract an titawpsak. Raikkonen hian contract a nei saah 2010 chungin euro maktaduai 16 vel hlauh tur a ni a, Ferrari-in chhawr zui lo mah se a hlauh tur hi an pe vek tho va, Raikkonen hi Rally-ah insawnin hlauh a la bawh a, a thawh loh hlauh Ferrari atanga a lak nen hemi kum hian a hlawk hle a ni.

Cricket league hlawhtling Indian Premier League (IPL) din a nih khan European Football kalphung leh NBA bakah professional league kal dan en lawrin, player an lilam (auction) ve thung. Lilam hun an siam a, player tam tak an chhawp chhuak a, club-in an duh player hnena hlauh pek an inhuam dan sawiin hlauh pe hnem thei berin an la lut. Chutih laiin India team-a awmte erawh an khelhna tur siam fel sa niin, team tinah Indian player leh ram dang player awm theih dan bithliah a ni bawk.

HETAH HIAN SMS LA

>>9774170328<<

👉 Engtik laiin nge Zarkawt thlanmual atanga Chhawngzinga tuikhur inkar kawng thlang hi Hunthar kan lo pek. Khawtlanga thingphun hnatlang an nei tak mai, kan khawtlang hruaituten mipui hrilhfiah a va ngai ve.

986213_43

👉 N-Section Zuangtuikhur a inbual/insu thin te kha, tuikhur tui kha min dim sak hram teh u. Ei leh in atana hmangtute tan a hreawm duh a nia..

977449_09

👉 Thlanmual kawng leh Edenthur road inpawhna lai hi siamthat dan a awm lawm ni. Motor lian deuh a kal ten tlan hlauhawm an ti sek mai si a, thuneitu YMA/Local Council te hian hma a lak theih lawm ni.

961215_30

👉 YMA Park-a ruihhlo ti la awm thin fo mai hi a khamawm ta khawp mai. 'In tih leh chuan in hming tarlan a ni tawh ang' tih a duhtawk mai lo hian a ti thin te hi chu man a zilh deuh hlek a tha mai lo maw.

897231_01

👉 Kan veng YMA ah hian Sub-Committee hrang hrang an awm nual a, hetihlai hian abikin Park leh Kumpulan te hian engangin nge maw hma an lak thin le. Park-ah ruihtheih thil tih leh vengchhungah ruihhlo zuar tih thawm a awm fo si a, hengah te hian hmalak dan a wm lawm maw ni le.

986231_92

(SMS kan dawn te hi Ed. Bd ngaihdan a ni vek kher lo)

ADMISSION OPEN

Aizawl West-a Hindi Zirna hmunpui leh changtlung awm chhun Comfort Hindi School (Gov't Primary School, Dawrpui Vengthar, Bazar Bungkaw Road) ah Second Session atan Class IV - BA thleng Admission hawn a ni leh ta. Morning Class kal hman lo tan Evening Class a kal theih bawk e. Tin, School naupang Hindi Tuition la duh tan zing leh tlahia pan theih kan ni bawk. Affiliated to Mizorm Hindi Prachar Sabha, Recognised by Human Resources Development Government of India kan ni.

Spoken Class : Free
Text Book : Free
Admission
Timing : 6:30 - 8:00 Am.
4:00 - 5:00 Pm.

Contact
9862657759